

Na osnovu člana 25. Zakona o slatkovodnom ribarstvu ("Službene novine Federacije BiH", broj 64/04), federalni ministar poljoprivrede, vodoprivrede i šumarstva donosi

PRAVILNIK O IZMJENAMA PRAVILNIKA O OBLIKU I SADRŽAJU OBRASCA DOZVOLA ZA SPORTSKO-REKREATIVNI RIBOLOV

Član 1.

U Pravilniku o obliku i sadržaju obrasca dozvole za sportsko-rekreativni ribolov ("Službene novine Federacije BiH", broj: 71/05) član 4. stav (1) mijenja se i glasi:

„Na obrascima svih dozvola navedenih u ovom Pravilniku (Prilozi 1, 2 i 3) od vrha prema dnu je tekst sljedećeg sadržaja:

1. Bosna i Hercegovina,
2. Federacija Bosne i Hercegovine,
3. naziv ministarstva koje izdaje dozvolu,
4. grb Bosne i Hercegovine u boji,
5. naziv dozvole,
6. rok na koji se dozvola izdaje,
7. serijski broj dozvole,
8. cijena dozvole.“

Stav (2) briše se.

Član 2.

Član 10. mijenja se i glasi:

Obrasci dnevnih, vikend i godišnjih dozvola (korice) za državljane Bosne i Hercegovine i strane državljane štampaju se u tamnoplavoj boji, sa žutim slovima. Svi brojevi godina, navedeni u ovom Pravilniku se odnose na lica koja su u godini izdavanja određene dozvole navršila ili će navršiti navedeni broj godina. Ribolov za državljane Bosne i Hercegovine i strane državljane sa stalnim nastanjenjem (prebivalištem) u Bosni i Hercegovini do 14 godina života dozvoljen je samo uz prisustvo lica starijeg od 19 godina."

Član 3.

Član 11. mijenja se i glasi:

Visina naknade za dnevnu dozvolu za državljane Bosne i Hercegovine i strane državljane utvrđuje se u iznosu od:

1. 20,00 KM za ribolov u svim ribolovnim vodama, osim u posebnim revirima,
2. 40,00 KM za ribolov u ribolovnoj zoni poseban revir.

Visina naknade za vikend dozvolu za državljane Bosne i Hercegovine i strane državljane utvrđuje se u iznosu od:

1. 40,00 KM za ribolov u svim ribolovnim vodama, osim u posebnim revirima,
2. 80,00 KM za ribolov u ribolovnoj zoni-poseban revir.

Visina naknade za godišnju dozvolu utvrđuje se u iznosu od:

1. 100,00 KM za državljane Bosne i Hercegovine i strane državljane sa stalnim prebivalištem u Bosni i Hercegovini od 18 do 65 godina života;
2. a) 50,00 KM za državljane Bosne i Hercegovine i strane državljane sa stalnim prebivalištem u Bosni i Hercegovini od 14 do 18 i preko 65 godina života,
b) 50,00 KM za državljane Federacije Bosne i Hercegovine invalidna lica, lica sa poteškoćama u razvoju, nezaposlene osobe, studente, penzionere i ribolovce ženskog spola starije od 18 godina.
3. 25,00 KM za državljane Bosne i Hercegovine i strane državljane sa stalnim prebivalištem u Bosni i Hercegovini do 14 godina života.

Korisnik ribolovnog područja/zone dužan je 10% od vrijednosti svake izdane dozvole uplatiti Sportsko-ribolovnom savezu Federacije BiH (u daljnjem tekstu: Savez)."

Član 4.

Član 12. mijenja se i glasi:

Godišnju dozvolu iz člana 11. stav (3) tačka 2. ovog Pravilnika izdaje korisnik ribolovnog područja/zone svojim članovima koji imaju položen ribarski ispit, za invalidna lica i lica sa poteškoćama u razvoju samo uz predočen dokaz o invalidnosti nadležnog stručnog tijela za ocjenu invaliditeta/poteškoća u razvoju, za nezaposlene osobe uz potvrdu nadležne službe za zapošljavanje ne stariju od 30 dana, za studente uz potvrdu o redovnom studiranju, za penzionere uz predočen odrezak zadnjeg mjeseca penzije i za ribolovce ženskog spola uz ličnu kartu."

Član 5.

Član 16. se briše.

Dosadašnji član 17. postaje član 16.

Član 6.

Ovaj Pravilnik stupa na snagu narednog dana od dana objave u "Službenim novinama Federacije BiH", a primjenjivaće se od 1. januara 2023. godine.

MINISTAR

Broj: 03-2/1-536-4/22

Sarajevo, 12.12.2022.godine

mr.sci. Šemsudin Dedić